

Date – 27/08/2024

Time - 18:30 Hrs

1. Vairengte leh Khamrang inkar kawng khuar te ni 15 chhunga hnawh zo hman tura hmalak mek a nih thu Kolasib DC Pu Robert C. Lalhmangaihan a sawi.
2. Myanmar lam atanga Mizoram kaltlanga nungcha tawlh ruk man chhuah chu a vaiin 166 a tling tawh.
3. External Affairs Minister Dr. S. Jaishankar chuan G-20-a Brazil President nihna chu a thlawp tih a sawi.
4. Supreme Court chuan Delhi liquor policy case-a eirukna leh sum chhehrelh thubuaia man Bharat Rashtra Samithi (BRS) hruaitu K. Kavitha chu bail a phalsak.

<><><>

KOLASIB ROADS

Kolasib DC Pu Robert C. Lalhmangaihan kawngchhia avanga tunhnaia Road Block tihtawp ni atanga ni 15 chhungin Contractor lam ten Vairengte leh Khamrang inkar kawng khuar te hnawh zo hman tura an intiam angin hmalak mek a ni a ti.

Vawiina a kaihhruaia Vairengte khaw chhung kawng chhia leh thil pawimawh dangte Vairengte a sawiho naah he thu hi sawiin, Vairengte leh Khamrang inkar kawng chu Cheng nuai 5,000 sengin siam that turin hmalak mek a a ni a ti a, NHIDCL lam pawhin Contractor tur zawngin Tender chhuah an tum mek a ti.

Meeting ah hian khawtlang hruaituten Vairengte khaw paltlangtu National Highway chhia chungchang leh khawtlang mamawh chi hrang hrang an thlen a, Vairengte Joint VC chuan Kawngpui chhia chu thawm that thuai an duh thu sawiin, tun dinhmunah lirthei tan kal a harsat tawh thu leh Assam nena inrina a police duty post hrang hrang te chu a tla bal in, thawm that ngai leh changtlung taka siam ngai an nih thu te sawi in, tun dinhmunah ramri a police duty post te chu lirthei engchi mah in a tlawh pawh theih loh thu leh fur leh thal a lirthei in a zawh theih a siam a pawimawh thu a sawi.

Vairengte Jt VC hruaitute chuan ramri ah buaina awm palh se kawngtha lo avangin harsatna lian zawk thleng thei anih thu pawh sawiin, Vairengte SDO(C) chu ILP pe chhuak ve thei tura hmalak an duh thu leh SDO(C) office ah Staff an indaih loh avangin Staff dah belh an duh thu pawh DC hnenah hian an thlen nghal bawk.

He huna kalkhawmte hian Kawngpui thlur li (four lane) kawng laih turah chhungkaw 17 chuang te chu Package 2 ah awmin, anni hian zangnadawna an la hmuh veloh thu leh Package 2 chu Assam lam enkawlina hnuiaia awm anih thu te, ram neituten zangnadawna an dawn thuai theih nan hmalakpui turin Kolasib DC chu an lo ngen bawk a ni.

Meeting ah hian Vairengte SDO (C); SDPO; Joint VC aiawh; Joint YMA aiawh; Vairengte Pick Up Association aiawhte leh political party aiawhte an tel a ni.

<><><>

VC BY ELECTION

State Election Commission chuan Mizorama Village Council thenkhat By-Election neih hun tur a puang a, State Election Commission chuan Champhai District-a Village Council pali Khuangthing, Leisenzo, Ngur leh New Champhai VC By-Election hun tur a puang a. Hemi rual hian District dang – Aizawl-a Sihphir Venghlun, Lunglei-a Bungmun West, Serchhip-a Serchhip Chhim Veng leh New Serchhip North, Mamit-a Dampa Rengpui - 1, Kolasib-a Saidan leh Nisapui, Khawzawl-a Chawngtlai leh Khawzawl Dinthar leh Hnahthial District a Hnahthial South II VC By-Election neih hun tur a puang bawk. He inthlan chuh tumte tan Sept ni 3 thleng hming theih a ni a, Inthlan hi September ni 24-ah neih tur a ni a, Vote thlak zawh veleh atangin Vote chhiar tan nghal a ni ang. Inthlan that a tul a nih chuan September ni 25-ah neih tur a ni. Champhai District-a By-Election neihna turah hian Ngur-ah member 5 (General 4 leh Reserved 1) thlan tur a ni a; New Champhai leh Leisenzo-ah te General Seat 1 ve ve hnawkhawh tur niin, Khuangthing ah Reserved Seat 1 hnawkhawh tur a ni thung.

<><><>

HNAHTHIAL HIGHWAY

Hnahthial District Bawrsap Pi Rita Lalnunmawii Pachuau kaihhruaiin Hnahthiala National Highway-54 kawng chungchangah meeting neih a ni a.

DC chuan Hnahthiala National Highway chungchanga hmalakna kawng hrang hrangah kal khawm ho chu thawhona tha neih tlan a tul thu sawiin NHIDCL a ni emaw, ABCI leh Mathiyan pawh ni se hmanrua leh thil dangah harsatna an neih chuan inpuih tlan a tul a ni a ti a. Kawng a chhiat hlimah a chhak lam ram neitute tan compensate a awm theih leh theih loh Lunglei-a CALA biak an nih thu leh CALA lam hian thu leh hla an la rawn neih loh avanga kawng chhak ko pawh laih theih a la nih rih loh thu te a sawi a. Sub Hqrs YMA Vigilance and Monitoring Committee Hnahthial ten kawng bal laia lirthei lian tlan theih loh tura structure an dah chu tha a tih thu sawiin tun dinhmunah highway pangngaiyah chuan LMV chauh kal rih tura a duh thu a tarlang bawh.

Meeting thurel dan chuan ABCI lamin tuna kawng pangngai hi uluk takin lirthei tlan theih reng turin an enkawl ang a, hetih lai hian by pass laitu Mathiyan lam pawhin an kawng enkawl hi tha thei ang berin an enkawl ang tih a ni a. Hnahthial Truck neitute harsatna tawh, by pass chhuah dawna motor tang thin pawh sawilan niin he kawng enkawltu Mathiyan lam ten ni 3 chhung hun pe a, ngaichang turin an ngen a ni. Kawng minna lai by pass a gabion wall siam ngai pawh ni thum chhunga thawh tan theih an inrin thu Mathiyan lam chuan an sawi a ni.

Bawrsap chuan meeting thu leh hla hi an ngaihven zui reng tur thu sawiin, NHIDCL, ABCI leh Mathiyan lamte hi an insawi anga an awm lova, hotu lian zawk lama thlen a tul a ni pawhin a tul anga hma an lak zel tur thu a sawi bawh.

<><><>

LADC CEM

Lai Autonomous District Council-a Chief Executive Member Pu C. Lalmuanthanga chuan LADC huam chhunga chhiah lak khawm danah sum kawngbo awm thei-te ven a pawimawh a ti.

He thu hi vawiina LADC huam chhunga mumal zawka chhiah lak khawm a nih theih dan tur sawi hona hunah CEM chuan sawiin LADC-in tualchhung atanga chhiah a hmuh thin chu tun ai a him leh tha zawka lak khawm dan ngaihtuah tul a tih thu a sawi a, Online Payment hmanga chhiah petu ten chhiah an chhun luh theih dan tur pawh ngaihtuah a ngaih thu leh chu chuan sum kawngbo leh chhiah lak dan fel hlel deuh te a ven theih beisei awm a tih thu a sawi.

LADC-a Taxation changtu Executive Member Pu Sanghuliana Mualchin pawhin thu sawiin tuna LADC dinhmun leh hmabak a la neih te, hmasawna tura tanlak a ngaihna lai leh rawtna a neihte a sawi bawh.

Kalkawmte hian LADC Revenue dinhmun leh siamthat ngai laite, chhiah hmuh belh theih dan tur kawngte, chhiah ba chungchangte an sawiho a, chhiah lakna kawnga hmasawna a awm theihna atan Revenue Resources Mobilization Committee din tha an tih bakah an rawtna neihte pawh thuneitu sanglam te bawhzui atan thlen ni se an ti bawh.

<><><>

WILDLIFE NEWS

Myanmar lam atanga Mizoram kaltlanga nungcha tawlh ruk man chhuah chu a vaiin 166 a tling tawh. Mizoram Environment Forest & Climate Change Department hnuaiia Wildlife Division hotuten Akashvani Correspondent-an hrilh danin, Mizoram kaltlanga nungcha tawlhruk zingah hian sazu chi khat guinea pig a tam ber a, 20 lai man chhuah a nih bakah vaki chi khat, sulphur crested cockatoo leh saphai, ball python 18 ve ve te chu ramsa tawlhruk man chhuah tam ber pahnhna an ni.

Wildlife Division hotute sawi danin nungcha tawlhruk te hi khawvel pum huap ang pawh a man to tak tak te an ni hlawm a, Mizoram chhungah tak chuan lei tu an awm an hriat loh thu leh phai lama thawn tur an nih deuh vek thu an sawi.

Nungcha tawlh ruk man chhuahte hi a enkawl danah Wildlife hotute chuan anmahni pawh an inzir belh thin bakah mi thiam tam tak an rawn thin thu an sawi a, nungcha thenkhat chu a tawlh ru tuten chaw an pek that loh avang leh bawm chep tak taka an khung thin avangin an chauh thu leh a then phei chuan an thih phah hial thin thu an sawi. Nungcha tawlh ruk a hluar avangin Aizawl Sahuan pawh a chep phah thin thu leh nungcha tawlh rukte dahna tur pawh theih ang ang a ngaihtuah a nih thin thu sawiin, Aizawl Lungverh-a Mizoram Police ram pawh Aizawl sahan ram atan Mizoram Sorkar chuan a sahthlak sak a, Sahuana ramsa leh nungcha-te tan tui pawh a hma ai a tam lak a nih tawh thu an sawi bawh.

<><><>

SCHOOL EDUCATION & DDK MOU

School Education Department leh Doordarshan Kendra Aizawl-ten DD Mizoram channel-a Educational TV Programme (Zirna Huang) chhunzawm vawiin khan nan inremna an ziaik. He inremna ziah thar leh ah hian School Education Department aiawhin Director Pu Lalsangliana'n a ziaik a, Doordarshan Kendra Aizawl aiawhin Head of Programme Pu C.Vanlalsiama'n a ziaik bawk.

He hunah hian School Education Director Pu Lalsangliana chuan kum 2015-a bul tan Educational TV Programme chhunzawm zel a ni chu lawmawm a tih thu a sawi a. DD Mizoram chu thlirtu an tam a, khawpui chung mai bakah thingtlang leh ram thenawm atangin an thlir thei a, a hlawkna teltu an tam thei hi a hlu hle a ni a ti. Educational TV Programme neih hi a tangkai a, Ministry of Education pawhin 'best practices' zingah a pawmsak a ni tih a sawi a. Zirna lam thil pawimawh chi hrang hrang puan chhuahna programme a awm thei hi a lawmawm hle a ni a ti bawk.

<><><>

SCIENCE FAIR @ MAMIT

Vawiin khan Mamit-ah zirlai naupangte tan science fair neih a ni a, Science Fair hi DIET Mamit te buatsaih niin Mamit khawpui chhunga Middle School zirlaite an tel a ni. DIET Mamit zirlaite'n model leh experiment hmangin kalkhawmte hnenah entirna an pe a, he huna tel Middle School Science zirlaite atangin activity a tam thei ang ber lak chhuah a ni a, hei hian zirlai naupangte-ah Science thiamna leh hmasawmna bakah a tak taka kalpui dan tur a pek beisei a ni. Science Fair hi Mamit khawpui chhunga Middle school Naupang 300 chuanguin an chhim a. Naupang te atang hian an thil hmuh atanga an zir chhuah teh sak an ni.

<><><>

EXTERNAL AFFAIRS MINISTER

External Affairs Minister Dr. S. Jaishankar chuan G-20-a Brazil President nihna chu a thlawp tih a sawi. Vawiina India-Brazil Joint Commssion Meeting vawi 9-naah he thu hi sawiin Dr.Jaishankar-a chuan Brazil chuan khawvel tha leh tlo din tura hma a lakna chu fakawm atih thu a sawi. India leh Brazil inlaichinna chu kum 2006 khan bul tan anih thu sawiin kum tam tak hnuah a thang chho zel a ni a ti a. Tunah chuan ram pahnih inlaichinna hian a tuam zau tawh hle a, defence, space, cyber security, sumdawmna leh sum peipunna thlengin a huap tawh a ti. Brazil hian tun dinhmunah G20 President hna a chelh mek a. Kumin Novembere ni 18 atanga ni 19 chhung hian Rio de Jeneiro ah G20 Summit neih a ni ang.

<><><>

K.KAVITHA

Supreme Court chuan Delhi liquor policy case-a eirukna leh sum chhehrelh thubuaia man Bharat Rashtra Samithi (BRS) hruaitu K. Kavitha chu bail a phalsak. Justice B.R Gavai leh K.V Vishwanathan te awmna bench chuan Kavitha-i hi thla nga chuang hren tawh niin Central Bureau of Investigation (CBI) leh Enforcement Directorate (ED) ten a thubuai pawh an chhui zo tawh a ni a ti. Supreme Court chuan July ni 1 Delhi High court-in bail theihloha thutlukna a lo siam tawh chu a hnawlsak a ni. Kavitha hi kumin March ni 15 khan Banjara Hills, Hyderabad-a a chennaah ED te chuan manin heta tang hian Tihar Jail ah khung a ni a. April ni 11 khan CBI ten an man chhunzawm veleh a. Hetihlai hian Kavitha-i hian an puhna zawng zawng ah a fihlim vek tih a sawi a ni.

<><><>

NATIONAL TASK FORCE

Supreme Court-in ramchhunga medical lama thawkte himna ngaihtuah tura a din National Task Force chu a vawikhat nan vawiinah an thukhawm dawn. Thutkhawm hi New Delhia neih tura ruahman a ni a. Union Cabinet Secretary chuan he thutkhawm hi a kaihhruai dawn a. Task Force member zingah hian Union Home Secretary, Chairperson National Medical Commission, Surgeon Vice Admiral R. Sarin, Director AIIMS Dr. M. Shreenivas leh Department of Neurology, AIIMS Professor hlui Dr. Padma Srivastava te pawh an tel. He thutkhawmah hian member ten buaina thleng hrang hrangte sawihoin rawtna an neihte tarlan a ni a. Hei bakah hian Union Health Ministry chuan national portal an siam a, he portal hmang hian National Task Force te hnenah rawtna hrang hrang an thlen thei dawn a ni. Tunhnaia RG Kar Medical College and Hospital, Kolkatta-a doctor pawngsual leh thah anih chungchang thubuai a ngaihtuah laiin Supreme Court chuan National Task Force hi din a rel a. He Task Force hian kar thum chhungin an rawtna hmasa an thehlut anga , thla hnih chhungin a kimchangin an thehlut leh dawn a ni.

<><><>